

Fiche G3-i Ka inniuimakak kie eka ka inniuimakak

Apu takuak anite innu-aimunit ne ka ishkieu-pimipanit aimun kie ma ka napeu-pimipanit aimun. Ne mishkut takuan eshikatet, ka inniuimakak kie eka ka inniuimakak. Miam anite mishtikushiu-aimunit/kakusseshiu-aimunit etutakanit tshetshi tshissenitakanit ka napeu-pimipanit aimun kie ma ka ishkieu-pimipanit, tshika ui pakunu tshisseniten.

Apu nasht uemut tshissenitakuaki neni tshe ishinakuaki aimuna. Mitshet ishinikatamuna takuana ka inniuimakaki kie eka ka inniuimakaki mak nasht apu tshissenitakanit tshekuan ma uet ishinakuak. Mate anite mishtikushiu-aimunit, tshekuan ma neni aimuna uet napeu-pimipaniti aimuna kie ma ka ishkieu-pimipaniti? Une fraise, un bleuet, une framboise mak un raisin. Kassinu neni aimuna uaitakanua mina. Ek^u anite innu-aimunit, neni aimuna anite ka inniuimakaki kie ma eka ka inniuimakaki ishinakuana : uteiminan (eka ka inniuimakak), inniminan (eka ka inniuimakak), anushkan (ka inniuimakak) mak shumina(ka inniuimakak).

		ka ishkieu pimipanit ↓	ka napeu pimipanit ↓
Ka inniuimakak	→	framboise / anushkan	raisin / shumina
Eka ka inniuimakak	→	fraise / uteiminan	bleuet / inniminan

Muk^u ute, apu tshi issishuenanut ne aimun ka ishkieu-pimipanit tapitin ashit ne aimun ka inniuimakak kie ma aimun ka ishkieu-pimipanit tapitin ashit ne aimun eka ka inniuimakak kie iapit neni aimuna ka napeu-pimipaniti.

Tshipa tshi tshissenitakanua tshe ishinakuaki neni passe ishinikatamuna ka ishi-uitakaniti miam ka inniuimakaki aimuna : auenitshenat (napeuat, ishkieuat, auassat, tshishennuat...), aueshishat (atik^u, atim^u, mush, enik^u...). Ek^u neni kutaka aimuna apu tshitshue tshissenitakuaki tshipa ishinakuana, ka inniuimakaki kie ma eka ka inniuimakaki.

Tshetshi tshissenitamin tanen aimun ka inniuimak, tshipa tshi tshisseniten neme aitun apashtaini : nuapamau (ka inniuimakak). Tshipa tshi issishuenanu : nuapamau aueshish, nuapamau atik^u, nuapamau atim^u, nuapamau nishk... Tshipa tshi ashit issishuenanu : nuapamau Mani-Akat, nuapamau Pienish, nuapamau nutaui, nuapamau nishim... Mak ashit neni kutaka : nuapamau asham, nuapamau uapimin, nuapamau pishim^u... Eukuan uet tshi tshissenitakanit aimun ka inniuimakak. Tshipa tshi ashit apashtan kutak aitun, miam ne kutak aitun peshu.

Tshetshi tshissenitamin tanen aimun eka ka inniuimakak, tshipa tshi tshisseniten neme aitun apashtaini : nuapaten (eka ka inniuimakak). Tshipa tshi issishuenanu : nuapaten mitshuap, nuapaten tetapuakan, nuapaten mashinaikan, nuapaten meshkanau... Eukuan uet tshi tshissenitakanit aimun eka ka inniuimakak. Tshipa tshi ashit apashtan kutak aitun, miam ne : peta...

Neme aitun menu-tapitik anite ishinikatamunit, eukuan tshe minu-uitamatshemakak eshinakuak ne ishinikatamun, tshima inniuimakak kie eka inniuimakak.